


# Tumba 2014 dedica na Frenk Kock y Papito Rafael



ORANJESTAD (AAN)- E aña aki Tumba Festival 2014 lo wordo dedica na Frenk Kock y Papito Rafael. Dos persona cu un trayectoria largo riba tereno di musica aki na Aruba.

Siguientemente e historia di bida artistico di Sr. Frenk Kock.

Sr. Frenk Ronald Kock ta naci na Aruba dia 17 di Augustus 1962 y ta yiu di Sr. Federico Generoso Kock q.e.p.d. y Sra. Juana Susana Kock q.e.p.d. cu e ta considera su heroenan. Su hobbynan ta deporte y musica. Sr. Kock ta conta cu e ta bin di un cuna di famianan musical cu ta famia Kock y Ras. Cu su 9 aña su ruman homber grandi Victor Kock a siñe toca e accordnan di do re mi fa sol la si riba guitarra. El a bay les tambe cerca Meneer Chong. For di 4de klas caba Sr. Kock tabata bay school cu su guitarra pa asina e haya puntacion pa zingen pa rapport. E tabata para dilanti klas pa toca y canta y ta haya 9 riba rapport. E tabata compaña e muchanan di 4de klas tambe hunto cu juffrouw Fun den e show di Matinet na Tele Aruba.

Cu su 13 aña el a forma parti di e banda musical The Extra tocando baho hunto cu su primonan. E mes un aña el a canta coro cu su primo den e Festival Voz di Oro pa e cantante Jeff Lind y a sali na di 2 lugar.

Cu su 17 aña el a wordo aserca pa e ex integrantenan di Sensacion del Caribe pa forma partidi e banda La Nueva Sensacion como bahista caminda el a considera esey un bunita experiencia. Na 1985 Sr. Kock a cuminza toca cu su omo Eregino Ras te na aña 1987. E mes un aña ey el a forma un banda hunto cu su primo Gaby Ras, Goyo v.d. Linden y Eugene Geerman q.e.p.d. e banda Future. E tabata bahista y cantante di e banda pa 5 aña consecutivo como houseband. Nan a toca na diferente hotel como houseband entre otro La Cabana, Holiday Inn y Paradise Beach Villas te na aña 1997.

Sr. Kock tabata forma parti tambe di Placentero Ritmo y Cuerde y tambe e banda Passport.

Cu diferente composicionnan di su mes el a competi tambe na diferente festivalnan di musica Mexicano y a sali na promer lugar na 3 ocasion. Den e festival di tumba di nos carnaval el a participa un total di 10 biaha te ora su yiu homber Ronwayne Kock a haci 12 aña, el a stop cu tumba pa dedica tempo mas na e parti musical y te caminda cu e ta awe.

Na 1999 el a competi pa prome biaha den e festival Un canto pa Aruba su Himno y Bandera cu un composicion di su omo Eregino Ras y a sigui compete cu na aña 2011. El a yega

di traha varios composicion y tambe pa Ronwayne pa e festival aki. En total e tin 14 aña ta participa den e festival di Himno y Bandera como cantante, musico y compositor.

Actualmente Sr. Kock, hunto cu Sr. Gabi Ras, Robert Thijssen y Benito Loepstok ta formando parti di e banda musical Reflexion Band cu ta toca musicanan di 60 y 70 y ta bahista, cantante y director musical.

Hunto cu su dos yiunan Ronwayne y Cristella e ta tocando tambe pa e banda A-Positivo pa ambientenan familiar.

Na 2012 Sr. Kock a wordo invita hunto cu su yiu homber Ronwayne pa participa den e festival di Seu na Corsow cu 1 composicion hunto cu Opi Tio di Corsow. Segun Sr. Kock e tabata un experiencia hopi bunita di un bunita festival cultural.

Den su historia musical Sr. Kock tin 2 cd cu el a adapta tur aña cu su cancionnan nobo y un di su yiu Ronwayne. Un ta Un canto di un famia pa bo Pasco y Aña Nobo, uno ta un canto di un famia na nos Himno y Bandera hunto cu su dos yiunan Crisstelay Zhaisky, y tambe e tin un dobbel cd cu e banda Reflexion band cu cancionan di 60 y 70.

Sr. Kock kier a gradici na prome lugar Dios Todopoderoso y bise danki pa por a dune bida y cu e por a nace cu un don musical pa composita, canta y toca pa su pueblo Arubano, tambe pa su 3 yiunan supertalento cu tambe ta sigui su pasonan. E ta gradici di curazon tambe tur esnan cu a apoye den su bida musical y pa papa Dios por dune bida y salud pa e por sigi canta, toca y composita cancionan pa su Pais Aruba ariba tur genero musical.

Sr. Kock su mensahe ta pa stima y balora loke ta di nos, no permiti pa ningun hende bin cambia nos custumber y corda semper cu tin respet di un pa otro. No lubida nos bon maneranan cu nos mayornan a siña nos. Goza di nos festival y apoya tur nos artistanan. Pasa un dushi carnaval 60 y cu tur seguridad.